

■ CONVIVENZA

In bun gust han ellas, las fiergnas

DA PIEDER CAMINADA*

Dapi che la probabla-main attractiva Eva ha surmanà il bun Adam cun in mail (u cun tge er adina) ed il char Segner ha fatg ir els al diavel, n'èsi tar nus betg pli uschè paradisc sco en il temp biblic. Perfin en il mund dals animals regia ina guerra senza schanetg: prest mintga bestga tragutta in'otra. E quai po er esser vaira brutal sco che cumprovan ils lufs grischuns cun lur preferenzas nunsurvesaivlas per da tuttas sorts charn-nursa e charn-tschat.

Ch'ìls lufs pon esser maligns na savain nus betg pir dapi ch'ìls lufs dal Calanda sa laschan puspè ir bain qua tar nus. En noss stgazi da plets na datti betg mo casualmain la locuziun «in luf en pel-nursa». Quai è in sinonim per insatgi che sa dat amiaivel e gidaivel, ma persequitescha intenziuns malignas. Betg da smirvegliar ch'ìls lufs han ina reputaziun uschè schletta tar nus.

Dal reminent, savevas vus che nossas fiergnas n'èn gnanc in zichel meglras ch'ìls lufs? E che quests animalets charins engrevgeschan la vita als jaguars fermes e sperts? Sche betg, duessas vus ina giada dumandar las societads d'assicuranzas svizras. Quellas han numnadain



chattà ora che nossas fiergnas van talmain al viv al jaguar e co. ch'i dat onn per onn donns da radund 40 milliuns francs. En cumparegliaziun èn ils stgarps dals lufs – ord vista finanziaria – anc pulit modests.

Vus sminais gia: cun «jaguar» n'è qua naturalmain betg manegià il giat grond selvadi, mabain la marca d'auto da medem num. E quellas carossas noblas britannicas sa laschan las fiergnas gugent gustar cun magliuccar uschè ditg vi dals cabels ed uders fin ch'il donn è chaschunà. Sumegliant bainvis sco il jaguar èn tar nossas fiergnas er il BMW ed il Mercedes-Benz. In bun gust han ellas, las fiergnas.

Ma er en ils circuls da las fiergnas pon ins apparentain sa disputar davart ils gusts. Uschia preferescha ina maiortad dad ellas per lur magliucchim autos che n'èn betg dal tut uschè chars. Spezialmain

appreziadas èn tar ellas las marcas Ford, Renault, VW, Seat, Skoda ed Alfa Romeo. E cunquai che sa chattan davant nossa chasa a Castrisch gist dus represchentants da las marcas preferidas ha ina fiergna era gia mess ina giada maun vi da noss Ford – ed uschia contribuì a la summa dal donn astronomica da 40 milliuns francs.

Sco Grischuna u Grischun na duessas vus ussa betg tschiffar panica. Era lura betg, sche vus posedais in auto da las marcas che vegnan spezialmain amadas da las fiergnas. La ristga d'in donn da fiergnas è numnadain per 60 enfin 80 pertschient pli pitschna en noss chantun che per exempel en ils chantuns Appenzell Dadens, Turgovia u Son Gagl. U calculà en in'otra moda: statisticalmain stuais vus quintar cun in donn da fiergnas be mintga 200 onns. E perquai ch'jau hai gia subì il donn da fiergnas statistic na datti per mai era nagina raschun da stgatschar ils animalets charins or dal paradis da fiergnas da Castrisch. Tgutg èsi be sch'ina fiergna perfida da Castrisch ha gia damaun puspè gust sin in Ford u in Renault...

* Pieder Caminada è mainaproject scolaziun e redactor tar la «Südostschweiz». El è creschi si a Glion en in ambient per gronda part tudestg e viva oz en il vitg rumantsch da Castrisch.